فهمي علي نصر

لأ ..مش أصحاب

أشعار بالعامية المصرية

الطبعة الأولى ٢٠١٨



بطاقة الكتاب

عنوان المؤلّف: لأ ..مش أصحاب

المؤلّف : م. فهمي علي نصر التصنيف : أشعار بالعامية المصرية

رقم الإيداع: ٢٠١٨-١٠٨١٤

الترقيم الدولى : ٩٧٨-٩٧٧-٦٦٥٦ الترقيم الدولي

عدد الصفحات : ١٢٨ صفحة

رقم الإصدار الداخلي: ١٩٠

تاريخ الإصدار الداخلي: مايو ٢٠١٨ طبعة أولي

تصميم الغلاف والتنسيق: الشاعرة منى الغريب

جميع حقوق الطبع والنشر محفوظة للشاعر، ولا يحق لأي دار نشر طبع ونشر وتوزيع الكتاب إلا بموافقة كتابية وموثقة من الشاعر





الاهداء

إلى التي فيما روحي تميم

g wir sa

رملد رممه



سكوٺ

الليل على وش النهار راسم خطوط بيقول له فوت و اياك تفكر من جديد ترجع هنا إياك تعدي ع الشطوط من بکره هابقی مرتین مش مفصولین و هاجيب معايا ألف سوط هاجلد جميع الفرحانين و اصرخ .. يا مين لساه غبی و طالعله صوت هافرض سكوت على كل روح فيها النفس



و الخوف يكون هو القبس و ان عين شافتني بأي لون غير السواد لو أي واحد قال لي بم من العباد هار میه ف سر داب اسمه موت هاطفى الأمل جوه النفوس و الحلم يصبح ١٠٠ كابوس و هاخلي أوجاع البكا .. ف الناس تدوس هاحرق بساتين الورود لو حتى عود هاقطع جدوره كلها و اسقيه دبول ما انا هابقي غول شايل ف إيدي مقصلة للِّي هاينطق أو يقول الليل عمل ع الدنيا سور

حبس البشر من غير سبب

بين الصحاري و البحور

عمَّال يدور

و قلوبنا مش حِمل الألم لحظة يثور

يا أرض بور

عمَّالة تحبل م الكلاب جنب الجسور

حتى البعيد المفترض نلقاه بخير

غرقان شِخير

متخبّي في دروب اللي فات

ناسى اللي آت

أو شايفه أبعد شئ يكون عن أي نور

كل الأماني اتسرسبت

و مفیش خلاص

أصل الرصاص

أصبح كما لعب العيال

على كل حال

كل اللي كان ممكن يكون

أصبح محال

يفضل سؤال

مين قال لمين

إن السنين الطيبة تيجي بميعاد

و تجيب معاها خير كتير

ميَّة و زاد ؟

و ان الحياة .. كل الحياة

خلفة ولاد ؟

.

لاً ..مش إصحاب

إزاي ابقالِك يوم صاحب و أجيلك واسمع حكاويكي عن ناس يتمنوا و لو نظرة مخفیة و من طرف عنیکی و ازاي استناكي تبوحي بحاجات هتكون فيكي ساعتها كات ليا لوحدي و انا حبيبك و اقدر اتحمل حرقتها ده انا اموت من حرف ماهوش لبا و اغرق ف دموع من جوايا لما ما نبقاش لحظة حبايب و القصة يكون فيها نهاية ازاي ابقى لِك يوم صاحب



و انا سيبت الحلم على كفوفك و سُكرت بريقك .. فعشقته و الدنيا بقت بس كسوفك يا بحور الحب المجنونة النايم موجها على حدودي دا انا روحي بعشقك مفتونة و وجودك ف حقيقته وجودى لا هاكون لك صاحب غير و احنا دايبين ف هوانا بنتمني و حروف أبامنا نجمّعها و نعيش جواها عشان جنة أرجوكي بلاش تاني تقولي خلينا اصحاب و ابقى احكيلي مش هابقي ف يوم إلا حبيبك و لا يوم هتكوني إلا سبيلي

. . . .

لیل مهموی

مطر و غيوم..

و ليل مهموم

و ناس بتقوم تقع تاني

قلوب تايهين.

دموع ف العين

و روح مخنوقة و بتعاني

و لو تسأل ما تلقى جواب

يريح نفسك الخايفة

فترجع تنتبه إنك ...

عينيك م التوهة مش شايفة

و لو شافت ما تحلمش

يكون بكره اللي جاي أجمل

عشان لون الحياة بهتان

مفيش ألوان عشان يكمل



و لو أحاسيسك اتهزت و قولت النور ف يوم هيبان و قولت ان اللي جاي ممكن يجيب لى أمارة أو برهان تلاقى الجيّ بيمسَّخ بیرمی هموم و یطرح خوف لإنه خلاص ماهوش قادر يسير في طريق ماهوش مألوف یا أرض براح و محبوسة و فیکی الورد طارح شوك و خانقة الضحكة جوانا و عايمة ف دم بات مسفوك كفاياكي وجع فينا سببيلنا حتة بالألوان يجوز بالصدفة نقابلها دا انا نفسى أعيش إنسان

جرب

جرَّب مرَّة تكون إنسان شايف لون الدنيا بروح غاسل نفسه من الأوجاع كاره تبقى حياته جروح ناوي ببسط في المتعقد غاوى يفك خيوط الخوف شايل ضحك تملي ف قلبه عايش بين الناس مألوف إيده تملى تملى تطبطب ع المتضايق و المخنوق ماشى بصدق ف سكة غيره نفسه بجد الحالة تروق و ارجع قولى ساعتها ... ازيك

و احكي و قوللّي لقيتها ازاي شو فتها فاتحة ... شو فتها غامقة عامل إيه مع بكره الجاي ر وحك من جو اك إيه حالها طعم الكون في وجودك إيه نمت كويس .. و لا مقلّق فاکر وجعك و لَّا ناسيه شوفت جمال الناس و عرفته إيه أخبار أحلامك .. إيه ؟ صدقتني إنك من جوه حد بجد ماليه الخير صوتك غنوة و عينك حلوة و فیك إنسان طیب .. و ضمیر صدقتني إن إنت حقيقي حد بجد كتير إنسان و انك شابل جوه ف روحك



قلب رقيق بيفيض بحنان و ان رضاك و صفا ف إحساسك ممكن يبقى جناين ورد لو فكرت تسيبه براحته يقدر يملا ربوع الأرض

• • • •

حلی و طار

حبها و أخلص ف حبه و ف عنيها بني له معبد يصحى بالليل و يناجيها فكره لم يوم قاله نبعد عشمت روحه و خياله لما قالت بكره لينا حلمه طار به فوق نجومه بيتنا هيكون جنة بينا كل ما كان فيه عشقها و النجوم سكنت سماها لو تغيب الدنيا تحزن حتى روحه تغيب معاها الكلام بس بحروفها

و الأمل بقى لون خدودها الجمال كله ف صورتها و الحدود صبحت حدودها كل سكة بيمشو ا فيها أصبحت جواه طريق قلبه صار ملك بإيديها حبها خلاه برئ بكره مرسوم جوه منه وحدها فبه الأمبرة روحه هامت غصب عنه و بمزاجه بقت أسيرة فكره و الأحلام و عمره و السنين الضايعة منه حر ًکت فعلا مشاعر ه سِنُّه ما مبقاش هو سِنُّه شئ وحيد كان فيها واجعه

إنها بين لأو آه لحظه ليل الخوف ينور و الحياة بتكون حياة فجأة صبحه يبقى ضلمة و الدموع تحرق عنيه رغم إن العشق ساكنه و حبها مضلل عليه

كل البشر شبهك

و لو كل البشر شبهك
و فى وشوشهم هاشوف صورتك
ما نيش هاقبل بغير روحك
و ريحتك لما يوم زورتك
و لا هاستنى اشوف ضحكة
غير اللي باشوفها جواكي
عشان النبض في عروقي
باحسه بجد وياكي

.



۱۰۰ میدان

مش هانادی علیکی تانی أصلى ياما كتير ناديت و انت حد بقلب قاسي بالظنون بتهدي بيت مش مهم ف عرف قلبك روح تضيع ف ظنون و غيرة و لا قلب يموت بحبه بین وجع و هموم و حیرة المهم ف عرف قلبك ان ليك الحق كله و ان غيرك يبقى ملكك و انت تتفنن ف ذله توجعه ... إيه يعني عادي

ما الوجع واخد عليه بس صدقني النوبادي دمعه ثار دم ف عينيه مش مهم الليل يعدي أو يهدى و يبقى دهر قصدك انه يعيش بجرحه بين وجع و ألم و قهر آخره إيه العند يعنى ليه تفكر تبقى فوق ليه يدوبك بس إنت اللي ف إيديك الشروق لیه ما تبقاش حد صافی طبعه دافی و فیه حنان مش ظنون على وهم كاذب تبقی حرب ف ۱۰۰ میدان

••••

أمل

لو لسه فيكي أمل ما انا كنت هاستني أروح لمين واشتكي و لا أقعد اتمنى يا سارقة منى الفرح و مبكياني دم إزاي تقولي اصبروا و مجهزة لنا الغمّ أيام بتجري و فسادك کل یوم بیزید یا مغطیانا بصدا ما احناش بجد حدید حوشى الكلاب عننا



بكفاية خوف ورا خوف نبيع عيالنا بقى و لا نقول دي ظروف و لا نغور من هنا طول ما احنا فيكي ضيوف

باب مفنوح

و باب مفتوح على امبارح ما فكرتش ابص عليه نسیت جو اه حاجات یاما و سر زمان حاولت اداریه لقيته بصمت بينادي و بيقول اني غيبت كتير و تاهت دنیتی بیا ما بین توهه و بین مشاوییر دخلت و خوف سکن فیا و كانت خطوتي بشويش هنا كان حلم انا شايله و ياما سألته .. ما جاوبنيش هناك ف الركن دا رسمة

برغم اني بليد ف الرسم لبنوتة كتير حلوة كانت ناقصة يادوب الإسم ف نظر تها حاجات حلوة و صوتها حتة من فيروز على لسانها حروف لكن بتنطق بيها لما تعوز و ف الركن البعيد جدًا كتاب أبيض بدون عنوان قريته مرة و را مرة فعلمنى أكون إنسان وع الشباك قميص اخضر و قطع ف كمه مش باين ف جيبه سيجارة مكسورة و عود كبريت لكين خاين عشان مرضيش يولعلي

و قالى ساعتها ما يصحش عشان صدرك ما يتعبشي و تلعب كورة ما تكحش قمیص طول عمری ما نسیته و لا فكرت أجيب زيه و نور باهت ماهوش واضح لكن حاسس أنا بضيه هاروح عنده و اشوف ماله يجوز ليام عليه جارت يجوز م العفرة بقى خايف و عانى و السنين دارت مسحت بإيدي أحزانه فصوت نفسى صبح مسموع سألته عن سبب حزيه فقالی نسیتنی و انا موجوع ما فكرتش ف يوم تيجي

و تسألني .. تشوف مالي و انا اللي كنت تحكيلي و بحكيلك على حالى هنا .. سري اللي كان سري و متخبي ما بين كراكيب فتحت الظرف فلقيته جواب مكتوب لأغلى حبيب مكان إسمه حروف حايرة و قلب النبض .. ما فارقهوش لا طول العمر علَم فيه و لا عرفت ليالي تحوش قريته لقيته جوايا بنفس براءة الذكرى كأنى لسه باكتب فيه و باتكلم مع بكره مسحت بایدی علی شعری

و بصيت ع اللى كان فبكيت عاتبت كتير اوي نفسي و قلت بحرقة .. ليه انا جيت

بنظلهي

أيوه كنت كتير باسامح كنت خايف يوم تضيعي كنت باتمناكي تبقي نسمتى الغالية و ربيعي بس عمرى ف يوم ما شوفتك ناوية تنسي .. أو تبيعي كنت سايب فيكي روحي تحرسك من أي شئ قبل نومي اسألها عنك كان سؤال حلو و برئ و انتظر ف الحلم تيجي تحضنيني و نبقى فوق نسهر الليل عشق راضي عشق هادي كله شوق

النوبادي مش لاقيني مش شایفنی مش سامعنی فيه جديد معرفش اقوله شئ و عهد الله و اجعني مین زرع جواکی قسوة مين سقاكي الشك كاس مین کسر جواکي حتة حتة كانت أحلا ماس حتة كانت لو تغيبي تبقى حضن و فيه بانام فجأة بتضيع و بشكوكك و بظنونك و الخصام رجعيلى حبيبتى تانى غصب عنك أو بكيفك مستحيل أحلامنا فجأة تندبح و بحد سيفك

مستحيل خوفك يكونلك نار بتحرق و تعیشیه و الرضا أدام عنيكي و انتي رافضة تحضنيه قلت لك و لا ألف مرة إن عشقك فيًّا كون و ان انا ف نظرة عنيكي قلب مش ممكن يخون صدقيني ... اللي بينا أغلا من كل اللي غالي اسألى النبض ف عروقك واسألى حتى الليالي هيقولولك إن روحي هي روحك .. فافهمي هيقولولك انى مخلص لكن انتى ... بتظلمى

من غير مانقولي

من غير ما تقولي أنا باحبك و لروحك روحي بتسبقني من غير ما تقولي اني وحشتك مشتاقة إليك .. يلَّا إلحقني من غير و كتير من غير تاني أنا بيكي و ليكي و باندهلك أحبابك .. ناسك .. أصحابك و الفرع العاشق من أهلك و نهارك لما يكون صافى و بيضحك أو حتَّى مكشَّر و الليل و نجومه و أحلامه و حاجات مش لازم تتفسّر زي إنتي ما فيًّا أمل عايش و بيحضن روحي. فيحييها و واخدني إليكي عشان عارف الكلمة صحيح بتخليني في الجنة باطير و انتي معايا و اسرح ف جمالك و استنى نفضل عايشين أحلا حكاية

ف عینیکی دمعه

مش هاسیب ف عنیکی دمعه مش هاسیب جواکی خوف مش هاعيدلك ... ما انتى سامعة مش هاقول تاني الظروف بس محتاج إنى اشوفك ماسكة إيد عيِّل يتيم فوق جبينه الحزن باين لونه بيه أصبح قديم بسمته کام جرح ساکن و الأماكن بتعاديه و الليالي دايسة روحه و البشر قاسيين عليه و لَّا حاضنة بنت خايفة

عينها شايفة نهار كئيب شعر ها منكوش تملِّي ضاق عليها كون رحيب من همومها بتستخبي حتى من نور النهار ما النهار ف عنيها غربة قسوة صعبة و انتظار و البكا صاحب جفونها من مذلة ليل طويل يأسها تقراه بنظرة و انكسارها ميت دليل نفسها تحلم ببكره جاي و جايب شئ جديد أي حاجة .. زي حاجة حتى لو ضحكة وليد إيده تمسح بس دمعة

فوق خدودها الدبلانين بوسة لجبينها اللي باهت زيّ كل الحزنانين مش هاسيب ف عنيكي دمعة مهما كانت ... بس ليه بايعة أحلامي اللي فيكي و الأمل بتكتفيه ياللي عشقك مش بإيدي ياللي عيدي ف ضحكتك ياللي نورك ليا ضلمة رغم إنى ف سكتك إمسكى بإيديكي إيدي سمعيني صوت نداكي روحی علی سکتنا و امشی كلنا هنكون معاكى

.

باموٺ فيکي

و عهد الله باموت فیکی يا سحراني أوي عنيكي يا ساكنة قلبي من جوه هاشیل من عمری و ادیکی بحور العشق ... أديها و موجه بكره أكون فيها و اخلیکي و اخلیها قصاید حب تحکیکی و عهد الله بامووت فيكي و هامشیلك كتیر مسافات و انسى ف همستك ما فات و يبقى الجاي كله سكات في محراب عشقي أنا ليكي

و عهد الله بامووت فيكي و اشوف بعيونك الأيام و احسك جوه منى سلام منين ما اصحى لحد ما انام و في الأحلام باناديكي و عهد الله بامووت فيكي يكون حلمي .. و اقابلك فيه نعيش الحب ... و ندفيه و نسمع وحدنا غناویه تغنيني و اغنيكي و عهد الله باموت فيكي یا سحرانی انا عنیکی

. . . .

الأماني الطيبة

ليه الأماني الطيبة جوه القلوب تصبح شقوق و الضحكة يخنقها الوجع و الهم يصبح ألف طوق ليه حلمنا بيضيع هدر نلاقینا تحت و کنا فوق و الخوف كده أصبح وتر و الفرح ليه أصبح أنين و حكاوي عمري الطيبة متسرسبة ف همّ السنين مليون سؤال من غير جواب بين البشر مش مسموعين عیِّل و صوته بینکسر



و عنیه بتغرق ف السکات بکره اللی کان جایب أمل جه حد قاله ده بکره مات بسذاجة قال راح یندفن لقی تربته ...
کل اللی فات

الليل بيسننى الدفا

و الليل بيستني النهار ... من ألف عام فاتح سكك و بيندهه بس النهار كره الكلام كره ان يبقى اللوم عليه من كل من خاف يبتسم أو يترسم أصل الحقيقة مؤكدة بس العيون بتخاف تشوف بتخاف تبص على السنين و الدنيا ... ممنوع الوقوف الصبح علشان يعرفك محتاج عيون و مفتحين



محتاج يحسك فيك نفس بيطول و يتحدى الوجع و يدوس على كل الألم محتاج يشوف جواك جدع الليل بيستنى النهار يخرج ما بين أنياب زمن يكسر بإيده ألف ناب و يولع النار في الوهن بس الغريبة .. الليل سكون نايم بقاله ألف عام فارد لحاف على جتته بينادي .. و بيرجع ينام فيا كل ليل جوه البشر حاسب بقی إرمي اللحاف اللي انت تحته

و الدفا صار محرقة عمر الحياة ما تكون صور و لا حتى لوحة مزوقة سيب اللحاف و بلاش تخاف .. و تسيب آمالك تنتحر و بلاش تعيش و هم الجمال و تقول نجومي و القمر هز السكون ... حاول تكون في الدنيا كما صوت الوتر

معاه

كان حلم انا عشقته و بجد صدقته علشان ف يوم دوقته كان أحلا ما في الكون کان روح بتحضن روح ف السر قبل البوح ليه فجأة يصبح نوح و لَّا الهوى مجنون ؟ على غفلة يبقى دموع على سكة مالها رجوع و الروح تعيش الجوع علشان خیال و ظنون فنتوه و نبقى بعاد



ننسى ان بينا ميعاد و الفرح يبقى سهاد مقهور ف أقسى سجون توحشنی یا امبارح ماهو جه نهار جارح حلمي كده بارح و لَّا الرضا هيكون ؟ لو شوفته بوسلي إيديه و احضن بدالی عنیه برد الوجع دفيه قول له لروحه يصون طمن حاجات جواه و احكيله إنى معاه لا أقدر في لحظة انساه ولا اللي بينا اخون طبطب على قلبه

نور أوي دربه قول له أكيد ربه شاهد على المكنون و ان الظنون متاهات بتودي للزلات فتزيد أوي الأنات فبلاش نعيشها جنون

. . . .

هاسننی هناك

هاستني هناك

على ناصية آخر يوم في العمر

و اكتب لك ألف قصيدة شعر

و اركن بالحلم المتداري جوه القافية

على حيط بيميّل م الأشواق

و هاقول يا فراق

يا سلاح الزمن اللي بينهش في قلوب عاشقين

بتمرّ سنين

فباحسك لسه بتستنى تسحبني بعيد

برة المواعيد

تستفرد بغرامي و تقسى

و تدوس في الروح

و باشوفك طاير م الفرحة

و انا كلي جروح

انما يا فراق

مش هاسمح تاني لأوجاعك تسكن فيا

و لا تيجي في يوم تاني عليا

أصل انا يا فراق

إنسان مش عارف يبقى ف يوم مفيهوش أشواق

و لا عارف يهرب من عالم إسمه العشاق

و كمان يا فراق

أحلامي قصور عالية ف روحي

و الروح متاهات

بتداري ساعات

و تخبی حاجات

و انا أصلا قطّعت لجامها و ما باحبسهاش

و باسيبنى أهاجر جواها و ما باسألهاش

بتسافر في خيالي التايه

و تعلِّم في مشاعري الدايبة



و تداوي جروح كانت صايبة

على ناصية آخر يوم في العمر

هاستنى هناك

و هاقابل بكره المستني تحت الشباك

و هاقوله استنيتك ياما

و انت اتأخرت

لو ناوى تغيب تاني عليا

إديني خبر

و انا اكون فكّرت

_ _ _ _

الضحلة نهمه

امتى كان الضحك تهمه و النكد هو البراءة كل وقت و له أدانه افهمو با اهل الحداقة النكد هيهد حيلك و اصلها مش ناقصه هدّه فاسجنه ف سجن الضرورة و اوعى يبقى ف يوم معاندة اما ضحكك بابه واسع ادخله ... هتروق و تحلا و الحياة هتشوفها جنة و اللي وحشة أوام هتحلا

. . . .

ليلي المنفرب

و بانيم ليلي المتغرَّب على حِجرك فيطُّل نهاري و يثور الشوق المتعذب م اللهفة فيكشف أسراري و بانادي عليك من جوه الروح و اتنفس ريحة أشواقك فتحسي مشاعري المخفية و تقولى .. انا فعلًا مشتاقك يا ليالي براح سحرها صافي و بيلمس عمري فيحييني عاشقك و انا فعلا مش خايف یا عیون و شفایف ... ضمینی

• • • •



ظالهاني

يا ظلماني و انا قابل مسيرنا ف يوم هنتقابل و اجيبلك .. فرح و سنابل و اغنيلك بشوق .. موال أقولك .. خايفة ليه منى و عاشقة خلق ظالمنِّي و قاعدة عليا بتمِنِّي و راضية ليه بوقف الحال زمان قولتيلي ما تسيبنيش و يومها قلت لك هنعيش عشانك قلبي أنا درويش و عاشقك حتى في الترحال أجيلك .. تقفلي بابك

و صابَّة الذل لاحبابك و كلمة لأه في كتابك بقت ليا كتير تتقال نسيتي لما ضميتك و جوه عيوني خبيتك ما انام الأصل حبيتك و ليكي القلب كان مرسال بقیتی ازای کده خاینة و دمعه ع الخدود باينة يا ضحكة عليّا مش هاينة نزف دمي و عشانك سال باحبك و المشاعر صدق و روحى كالقليب بتدق و باخلصلك و اقول الحق يا فاتحة سكة الأندال لإمتى دا السكات هيطول

و غرقانة ف بكا على طول قوليلي مين بقى المسئول يتيمة بس حالك حال ما تصحی بجد و تفوقی أنا حضني أهو .. دوقي و عهد الله بحور شوقى تغرق سكتك بالمال هاضمك ... تدفى على صدري تنور ضحكتك فجرى لا عمرى هاسيب و لا هاجرى و تبقى الدنيا عال العال يا مصر يا سر جوايا يا أجمل قصة وحكاية دا انا ابنك اهو يا نساية سيبيلي الحمل اعيش شيال نعيش قصتنا م الأول

يا أمى نهارنا هيطول لا نتبدل .. لا نتحول ولا نسمع .. لقالوا .. وقال

ومين !؟

و مین یمسح بقی دمِّی و مین یبکی علی همی و مين يصرخ يقول ما يجوز أخويا اللي ابن ابوي و امي يا غدر ف غدر متخبي و عازم العقد تلعبّي حرام تجرح كده قلبي و تقتل خلق بتسمى دا جامع ياللي ابوك ابليس و دي جمعة يا دون يا خسيس یا راضع کذب مع تدلیس یا کلب بکلب متغمی سقوك تخاريف . شربت كتير




بتقتل لیه ... کده بضمیر ف دینا مفیش و لا تفسیر یقولك بالدما حمِّي یمین بالله مصیرك نار و في جهنم في أدنى قرار سقر لیكو هتبقى الدار بعهد الله یا نار زمِّى

......

حنين ياليل

مش کنت یا لیل حنین و بتضحك بانسجام و بتحضن ف الأماني و بتسمع للكلام و تمد إيديك علينا تخطفنا من الهموم ترسم ف وشوشنا بسمة و تصالح في الخصوم كنت بتيجي ف معادك بالثانية و بالدقيقة تنادينا بكل طيبة و معاك أحلام بريئة إزاي راح تبقى قاسي



إزاي تنسى اللي كان و تدوس فجأة ف قلوبنا و تشيل منها الأمان طب لیه خلیتنی احبك و احكيلك كل حاجة الباین و المخبّی أسرار من غير ديباجة دا انا كنت ياليل ف حضنك بالاقيني بجد عايش إزاى على غفلة تغدر و تسيبني حد بايش ف عنيه الشوف بيدبل و سنينه بقت عجاف بيخاف م الصبح جدًا فيحس الإرتجاف يا خسارة على الحكاوي

و الضحك مع الهزار طب فاضل إيه اعيش له أهلا بالإنتحار

. . . .

سفر

القرب في عيونك سفر يبدأ بحلم بيتولد قبل الميعاد لحظة شرود يفضل وليد في عنيه خيال من غير حدود كل اللي شاغله في الحياة عدم البكا أحاسيسه ساكناه وحدها ما فيهاش و لا شئ يتحكي غير إنه بس يكون برئ و انا عشقى لعنيكي الطريق بامشى الخطاوي كلها

جوايا لحن انا باعزفه حالم أوي بياخدني فيكي يضمني الحضن ده انا اعرفه أبدأ هناك ... أول طريق خطاوية بطعم الإشتياق تتمد فيًا خطوط كتير من غير عدد و ابعد كتير م الإنتهاء مفيهاش ألم مافيهاش ندم و قانونها ممنوع الفراق

شارع أحلامنا

ف نهاية شارع أحلامنا على باب كان طيب و صبور و الشمس بترفض ف شروقها إنها تدينا شعاع نور فالليل بيمد ضلام قاسى و يدوس ع الصبح المقهور و ف أرض بلادى المحسودة و النحلة بتاكل دبور و الخوف الساكن جواها و السور المخفى وراه السور و عيال مش قادرة تروح تلعب و لا تحلم ببنات الحور إياك تتخيل أمجادها و لا يوم تحضنها ف باسبور

يحفظ لك حقك ف الغربة غير إنك دايما مأسور الكل يشو فك خدامه و الحسنة تجيلك بالدور مش أد الدنيا و صدقني ف الأخرة هتطلع مأجور يشفعلك إحساسك فيها انها كت ساقية و كنت "التور" بتلف تلف و تعشقها و لا يوم حسيت إنك مجبور أمو اجها تشيلك و تحطك تخلص من بحر تلاقى بحور الشارع على غفلة بيقفل و يسببك قلبك مكسور فدموعك تجري على خدودك و تعبش ف ألامك محصور

الطابور

يا أول و آخر ولد ف الطابور يا قارى لكلامي ما بين السطور يا شمعة بنور ها بتسعد حياتي يا ميت ألف ضحكة و نور جوه نور كلاب مدوا إيدهم عليك بالخيانة رصاصهم قتلني .. و خانوا الأمانة لكن بكره يا ابنى بدون استكانة هاجیب بدری تارك ف ساعة ما اثور هاخدلك بتارك و هاصرخ سلام و انادى الحبايب كفاية خصام و افرق محبة و اوزع وئام و كل اللي كاره بلادنا يغور يغور اللي بايع .. يغور اللي خان



يغور اللي سايب وطنًا لشيطان يغمّي ف عنيهم ... و يتسلى بيهم يدلس عليهم جميع الأمور صبرنا یا ولدی و کفایة کده وجعنا هيصبح وجع للعدا وبركان هيكبر لآخر مدى عشان التعالب تعود للجحور وحق اللي باعت رسوله إلينا و ساب فبنا سُنة تضلل علبنا هناخد بتارك وحقك علينا بغضبة و موجه تهد الجسور

. . . .

الكفوف

ياللي بتقروا الكفوف بصو كده ف كفِّي جايز تشوفوا اللي كان من بختی متخفًی أو تنصحوني أتوب ما ابقاش اعيش في خيال كل الخطاوي محال و المرّ متصفِّي ياللى بتقروا الكفوف دلوني أمشي إزاي و انسى جروح ما مضى و افرح ببكرة الجاي و علموني أكون



ماشی کحد السیف و عودونی أکون... زیّ البشر نسای یاللی بتقروا الکفوف دلونی أعشق مین خلونی أکون زیُّهم خلونی أکون زیُّهم أکره .. کما الکار هین علشان قلیبی انجرح و اهو بین ضلوعی حزین

فاكر لك

فاكرلك سلامك و رقة كلامك و حتى لخصامك بيخطفني شوق في سحرك باسافر و احاول و اعافر ماهو البعد كافر بيطفي الشروق بيخنق مشاعر و انا قلبي شاعر لهيب عشقة واعر و باني الفروق جمالك بيحلا أميرة .. و أحلا

و سورك بيعلا مفيش فيه شقوق تغيبي .. وانا أبكي و قلبي بيحكي عيوني بتبكي و عشمان تروق تروق لجل اضمك و افوتني في كمك أبويا و انا امك تعالى ... ندوق

يامفرقين الوجع

يا مفرقين الوجع .. هو انتو ما زهقتوش ؟ بتقطُّعونا حتت ... ليه بس ما فهمتوش ان احنا رغم الألم ... واقفين لكم حالفين ان انتو كافرين .. عشان لأمر الله ياخسارة ما فهمتوش مسلم .. مسیحی ماهیش فارقة مع اسيادنا اللي هاممكوا يسيل الدم ف بلادنا



لكن ف يوم الحساب و معادكو و معادنا ربی وعدنا پجیب حق اللي ما ظلمكوش اخرتها إيه و النبي .. و ف أنهي شرع و دين القتل يبقى لغة ... و الشك يبقى يقين و الفحش يصبح هدف و شمالكو يبقى يمين و لحد فین ننتظر م الكفر ييجي يحوش الدنيا من فُجركم فرحانة واقفة تشوف و نبينا من مرقده .. من فعلكم مكسوف

دا ما قالش من سنته .. ترعب أخوك م الخوف بالعكس .. وصنّى و قال .. إياكو ما تحبوش يا مفرقين الوجع .. ف الآخرة راح تلاقوه ساعة لا ينفع ندم ... و لا تعرفوا تخبوه هتقول أميري أمر ... بس انت م اللي طاعوه إنت و أميرك .. لعطر الجنة ما تشموش

- - - -

فوق

فوق بقى و انزل لأرضك بكفياك وهم و كلام و اجرى لملم جرح روحك لجل يوم تبقى ف سلام عشت جوَّه الوهم تايه بين كرهتك .. لأ بحبك بین خلاص عشقك كرهته بين هاقضِّي العمر جنبك السكوت له ألف معنى و انت صمتك عشته خوف ألف مرة تقول كفايه تمشى و تعود للوقوف الوقوف رهن الإشاره



بكلمة واحدة تقول سماح تنسى فعلا كل قسوه سجنها ف عينك براح فوق بقى ... قول مرة الأ على صوتك .. قول بلاش قول جراح القلب زادت قلبي مات و انا فاكره عاش قول هاعيشك تاني وحدي زي ما انا محتاج أعيشك مش ألم و انساه و عدى مش جناح مستنى ريشك مد إيدك .. خد بإيدي الطريق مش كله شوك و ان بقى .. إيه يعنى .. عافر ألف شئ راح يتعبوك بس بالله لو حبيبي

لو ف روحي حاجات تهمك كسَّر القيد اللي ساجنك جوه خوفك .. جوه همَّك انسى جرح و فيه الأمك كل يوم بتزيد عليك فرحتك لحظات و تهرب يرجع الحزن يناديك خدها مني ... مَرَّه كلمه بس وعد انك تفكر الكلام الحلو جدًا غالبا .. كداب ... و أكتر

صورة

عيش الحلم و خدلك صورة و انت بتضحك من جواك سيب أوجاع جواك مبدورة خليها بره ... هتستناك إلبس أجمل لبس شريته لما نویت تحلم و تعیش لمَّع جوز الجزمة بزمة و ما تنساش وشین ورنیش برأ روحك من تكشيرة حالفه تعيش العمر ف وشك إكسر قفل بيبان الفرحه و انسى و سيب الحلم يغشك خلِّي عيونك مرة تشوفك

عيل نفسه يكون مبسوط عيل بس الدنيا الخاينة شبكت روحه كتير بخيوط خيط من بُكرة و خيط امبارح خيط م الصبح الجاي حزين خيط من خوف دايما متجدد و من الناس و دموع و أنين خبط من حب اتمكن منك و ان حبيبك لسّه بعيد و الأشواق و اللهفة و امتى يرجع تاني فتبقى سعيد ركِّز تطلع صورتك حلوة شئ للذكرى تحن إليه كدبة بكدبة و انت عارفها زى الكدب ... هتفرق إيه ما انت العمر بحاله ف كدبة إيه ف الدنيا ما هواش كدب دنيا طبيعي تملِّي بتوعد شاطرة بجد ف وجع القلب تحلف . روحك تنزف قلبك يبكي تعيش ف مرار فاكذب بردو و خد لك صورة لحظة ف ليلك .. تبقى نهار لحظة ف ليلك .. تبقى نهار

مش کل لیل ضلهه

مش كل ليل ضلمه و لا كل صبح نهار و لا كل شوق يوجع و لا كل آهة مرار إحنا اللي أحلامنا وخدانا للأوهام نهرب من الدنيا جايز نلاقي سلام فنروح برجلينا و نخطى للمجهول تدمع أوى عنينا و زماننا مش مسئول نقتل حاجات حلوة

كان نفسها تكبر
فنجمِّل الوحشة
فتزيد و لا نقدر
و آخرها نتألم
و نتوه مع التايهين
لا عرفنا نتعلم
و لا عشنا مش فاهمين

الليل طويل

الليل طويل يا طيِّبة و نجومه ضلمة و مرعبة كلاب كتير مع هبهبة و بشر بتملا الكون عويل دموع بترسم ع الوشوش و عيون تبحلق كالوحوش الناس دى ليه ما بيسمعوش و الليل عليهم مش طويل المغلوبين عدد التراب بيئنوا من طعم العذاب عيِّل بهمُّه ف لحظة شاب و الحِمل فعلًا صار تقيل يا مفرَّ قين لوم الهموم

الناس خلاص مش راح تقوم ساكتين و غارقين ف الوجوم ف حكاية مش عايزة الدليل من تاني باحلف لك حرام يا مطاوعة أو لاد اللئام ليه تزرعي فينا الخصام قلبك و عهد الله بخيل أمى قالت لى من زمان إلعن أبوك لو مرة خان و ابدر ما بين الناس أمان و لا ترضى تبقى ف يوم عويل فاكر كلامها و حافظه صم فرویت ترابك منی دم و انتى و لا الحجر الأصم حِملي بايديكي ليه يميل ؟ ما تلملمبنا بضحكتك

وخدي بإيدينا لسكِّتك لا عتاب و لا هنبكّتك هنقوم معاكى نشد حيل ما تصدقيش الكذابين و الزمارين و الطبالين دول كانوا وقت الشدة فين جيل الميدان لسَّاه أصيل لسَّاه بيحلم بك سما بنجوم بتعشق بالوما و الخير على وشك نما مش لیل و ساحب ... ألف ليل

من الأول

هاقول تاني من الأول بعادك نار بتكويني بعادك جرح بات نازف و سارق عمري و سنيني و عدتینی. یومین و ارجع فقلت الصبر يا عيني مسحت الدمع بكفو في و انا خایف لتنسینی باعد ثواني في غيابك و على بابك و باستنى أمني مشاعري برجوعك و اقول جايبالي ميت جنَّه سمعت البعد بيقستى

و بيغيّر حاجات بينا و بردو سمعت عن غربه بتسرق أحلا شئ منا لكنِّي بجد مش شايف غير اني في الغرام .. إنتي و قلبي سايبني و مهاجر و روحي تكون منين كنتي و طيفك ساري جوايا لا هان لحظة .. و لا هونتي حبيبتي .. و اعرفي اني باصونك .. زيّ ما صونتي

لو مطرحاة

لو مطرحك .. هانسي العناد

و اطوي الصحاري و البلاد

و اركب على ضهر القمر

و انسى البعاد

و اخد عيونك صاحبتي

و اعمل خدودك صفحتى

و اكتب قصايدي كلها بحروف شداد

و انسى ان فيه في الروح وجع

و ارمى الودع

مع ان عمري ما اصدقه

و لا باعشقه

لكني هاتحايل عليه عاشان يقول

ان انتی آخر سکتی



يمكن ساعتها تعرفي ان ف عيونك من زمان بالسر خبيت ضحكتي

باخاف منك

باخاف منك

و انا بأسمع أنين قلبك ...

ألم بيدوس في إحساسك

بأخاف منك

و انا المسجون ورا خوفك ...

و صابب دمعتى ف كاسك

بأخاف منك

و انا بأكتب حروف إسمك

على صفحة في كراسك

باخاف و اخاف .

و انا ف خوفي . ماانیش عارف

أخاصمك و لَّا ابوس راسك

باخاف منك عشان عارفك ...



ما بتحاوطيش على ولادك

بتنسیهم ... و ترمیهم ..

إذا مدوا في يوم إيدهم

عشان جعانین علی زادك

و دايما تخلفي ميعادك

و اخاف منك

عشان شايفك نسيتي الشوف من الغربال

و بتبيعي جمال حلمك ...

و بتجاوبي على سؤالي

و انا ف حلمك بألف سؤال

و لما بأدوس على خوفي

و اعيش فيكي ..

بلاقیکی دفعتینی ...

عشان اتعلم الترحال

بأخاف منك

و انا منك و من غيرك أنا مش شيئ

و من غيرك بتبقى الدنيا كرهاني و الاقيها بدون أسباب بتصغر كل يوم و تضيق و لما بأروح بعيد عنك تقوم رجليا تسرقني و ترجع لك في ألف طريق باخاف منك ...

عشان دمي اللي سال ع الأرض و سقاكي ما طهركيش و لا خلا عيدان بُكرة على بابك تبص لفوق و ما توطيش

و لا خلا قناديلك تزيح العتمة من ليلك

تنوّر بكرة لجل نعيش

ومش عارف أنا لإمتى هأخاف منك وانا درويش

ومن عشقى مقضِّي العمر على بابك

و لا لإمتى حاعيش محروم



أنام مرة على حجرك و اوري نفسي لصحابك و رغم انى باخاف منك مانیش قادر أجیب قلمی و اشخبط مرة في كتابك عشان قلبي اللِّي انا شايلة و شایلنی .. مخلینی و انا راضى أعيش راهب في محرابك لكن نفسى و لو مرة في يوم اصرخ و اقولك ليه تخليني اخاف منك وليه بتسيبي أيامك تخاصمني و تحرمنى أزوَّق عمري من سنك و مهما ابعد باعود ليكي و احوِّش فرحى في عنيكي ... هاقولك إيه ... ما انا منك

قصة حيانه

فجأة جاب قصة حياته صفحة صفحة ف ذكر ياته اللي لحقه و اللي فاته و اللي كان نفسه يلاقيه حلم عيِّل كان في بالله يبقى قادر يقرا حاله و الحياة تشبه خياله يبقى فيها و تبقى فيه كان شقى ... غاوى البنات يخفي قوله في السكات شاف بنات ياما وحاجات مش يادوب بس بعينيه في السكك ياما فات و عدى

لا اختشى و لا مرة هدّى و اما كان يشتاق لواحدة يوم و تبقى ما بين إيديه قلبه کان دایما مو ار ب عاشها دنیا و کان محارب و انتصر ع الموج بقارب مهما كان عالي و سفيه ألف كاس للحب داقهم ما انكواش من نار فراقهم و المشاعر راح سارقهم لما تاه بین مین و لیه ياما عاش .. و العمر تاه كل شئ شاف منتهاه و انتهى مما ابتداه بس قلبه كان عاصيه فجأة قلبه قال دى .. هيّ

اللى بيها الدنيا دنيا أحلام الجنة في عنيا بيها عمري هابتديه حسّ عمره بیشتهیها ألف حاجة حلوة فيها نظرة هادية من عنيها تحضنه و بتحتويه سابها تسبح جوه روحه عشقها طبِّب جروحه هی سِره و هي بوحه و هي أجمل حاجة فيه عاش في محراب عشقه ليها ليله هي و صبحه بيها لمسة واحدة من إيديها تحیی ذاته .. و تراضیه



سنيورة

و كان قلبي لسه صغير ... برئ بيعرف يدوبك يعدي الطريق فيمسك ف روحي و بشبط ف بوحى و من فوق سطوحي بيصرخ .. حريق حريق في الرواية اللي كانت هناك سطورها بتوصف في حالة هلاك و عالم تسيبك .. فتفضل معاك و عيِّل بيحبي .. تقول دا الصديق عشان قلبه لسه بيرضع حنان بيضحك شفايفه تدفيك أمان بإيده يشاور .. تروحله في لحظة تبوسه ف خده ... يقولك كمان

و كام بنت لسَّه بلبس المدارس مر ایل و شنطة و ماشین فوارس تبص ف عنيهم .. تطبطب عليهم و تمشی و راهم ... و قد صرت حارس و كان قلبي لسَّه .. صغير .. برئ يشوف ست ماشية .. وراها العيال بلاعب ولادها بخفة و دلال يلعّب حواجبه ... يشاور .. يهزّر فعبِّل بكر كر ... و بسأل سؤال يا عمو أمانة تفهم مامتنا تروَّح بسرعة .. بيوحشنا بيتنا صحابنا و جير انا ... و تيتا و جدو أكيد راح يعدو و تفرح حارتنا و سنيورة حاضنة ف شنطة كتبها و باین علیها ... هیامها و دوبها برغم ان عيِّل تخين كان قاطرها

و جابر خاطرها .. بيمدح في توبها و کان قلبی لسّه .. صغیر .. برئ و قابل في مرة ... شباب مدمنين لا نِفعوا ف مدارس .. و لا فهموا دين بتبدأ معاهم بتثببت ولبّة و سطرین و شدة ... و خابور كان متین و راجل بمبنه بتحدف شمال و ضهره اللي محنى و شايل جبال من الهم لافح تلال غصب عنه و طمعان ف لقمة تكون بالحلال و قطين و قطة و حرب ف شوارع و كان حلم ماضى و اصبح مضارع تقوم المعارك بخربوش و عضة و قفزة و نطَّة ... يفوز فيها بارع و قهوة عليها خلايق كتير و شای جنب شیشه و دوشه و صفیر

و شیش یك یا ابنی و محبوسة دومانو و بقشیش کویس و سر کی فی بیر و كان قلبي لسه صغير .. برئ دموعه بتهرب ... و بشعر بضيق يعاتب زمانه اللي عدى و خانه فبثبت مكانه ... ف صمته الغميق شویة و قلبی کره کل حاجة و دنیا ف عبونه بتقلب سماجة مفيش ضحكة حلوة و لا حتى غنوة تجلجل بقوة .. بادو ب فيه فجاجة و عالم بتقسى على ناس غلابة بتنهش جتتهم ... كفعل الديابة و تشرب ف دم اللي كان لسه بينهم و دايما ظنونهم .. زيالة و خرابة يعدو يبصو ما يرمو السلام و مالية عيونهم معاني الخصام

لا بيمدو إيدهم يداوو جروحك و لا يسيبو روحك تحسّ بوئام عيال في الشوارع بقالهم سنين ماحدش سألهم .. يا واد انت مين شحاتة و تباتة .. و خطف و غتاتة و حبة شماتة عشان حزنانين و ناس مشتهية تشوف الرغيف من الجوع تملى ينام قال خفيف ف جنب اللي كانز و خازن فلوس و قافل و دانه و عامل كفيف كفاية يا قلبي و غمّض عنيك و دارى ف سكوتك .. حاجات لسه فيك بتوجع و تجرح .. بلا أي رحمة عشان دنيا زحمة .. بتضيق عليك

هانعلی

هاتعلم احبك هاتعلم احبك أوي بشويش و اتعلم إنى ف حبى أعيش و اتعلم لما اسمع صوتك تبقى إنتى خيالى و ما تفوتنيش هابعت لك شوقي اللي باعيش فيه و اكشف لك سري اللي مخبيه و هاقولك قلبي بيعشق ليه و ازاي هيبوحلك ما يخبيش و احكى لك عن أول مرة حسیتك فیها و روحت بعید و سافرت وطيفك في خيالي و الإيد في الإيد

عن كلمة و كان نفسي أقولها ليها معنى جديد و احكى لك عن خوفي ساعتها لا متسمعنیش هاتعلم أعرف اقول اسمك و أعيش وياه و اتعلم أعرف اكون فيكي و ما اقولش الآه وانسى اني عرفتك متأخر و العمر انساه اصل انت غرام ساكن فيا ... نفسي ما يمشيش

بيمرق كنير

لسانى بيسأل و اقول إنت فين يا حلمي اللي باقي . . و طرح السنين يا أول حكاية تعيش فيها روحي و قلبي بطلها اللي بايت حزين كتير قلت راجع ... ف بأفضل هذاك أعيد ذكرياتي اللي كانت معاك و اكلم حاجاتك ... و اكلم سكوتك و اعشم في نفسي بفرحة لقاك دا طول الليالي بيفرق كتير على روح بريئة .. و حب بضمير تمر بساعاتها بطيئة كئبية على قلب مغرم .. ف بيبات كسير بينز ف قصايد و يكتب حروف



يداري ف سطورها وجع جوه خوف مع النجم يحكى ف حكاوي طويلة و يستنى تيجى .. تقول الظروف ظروفك حبيبي خدتنى لبعيد لعالم بحاله. و فيه نار تقيد يطول انتظاري يضلم نهاري أكيد إنت داري .. و سايبني وحيد حبیبی تعالی و طبطب علیا و سبب ضحكة منك تكون لحظة فيا و حق اللي بينا .. و صورته ف عنينا قلوبنا الحزينة. هترجع هنيّة

الدنيا المقفولة

على باب الدنيا المقفولة

في وشوش الناس

على ناصية شارع كان طيب

و ملان إحساس

و ف عقب ليالي كانت حلوة

و صفاها جميل

بين ناس بتطبطب على روحي

و تقول مواويل

عدیت نبضات جوَّه ف قلبی

فلقيتها كتير

و أنينها بيجري ف شرايني

من غير تفسير

بصيت ع الشارع و أصحابه



و جيران حواليه

على غفلة صرخت بدون م ادرى ..

يا اخوانا فيه إيه

الخلق اتخرست و لا ردّت

و لا سألوا سؤال

و انصرفوا سريعا من وشي

كما لعب عيال

ف الآخر فوقت من التوهة

و سألت أنا فين ؟

فسمعت جواب ماسك خنجر

و عنیه قاسیین

إنت من الدنيا و في الدنيا

و ده طبع جدید

الناس جواها قلوب ماتت ...

جواها حديد

الطيبة بقت سلعة و بارت



و لا ليها زبون

و الرحمة يادوب في عيون عيل

متصاب بجنون

و الصدق مالوش عيشة ما بينا

و الكدب حلال

و جمال الحلم المتداري

أصبح في المال

لميت جوايا حاجات خايبة ...

و ريحتها زمان

و مشیت و انا باصرخ من تانی ...

بس انا إنسان

حبة إحاسيس

أنا ممكن اكون حبة أحاسيس و استنی ف حلمی کتیر مایجیش فاتعلق مرة بضحكة حلال و اعمل جناحات و اتو هم ریش واسافر جوّه نهار مخنوق و اصاحب ليلي ... فقلبي يعيش و انا ممكن اكون باهر ب من شئ و اتدارى بعيد و اتمنى الاقيه و باطوِّل أوى و اسرح في حاجات و اختار يوم ضاع و أحنّ إليه و اكتب في كلام ... و امسح و أعيد و اتعمد ألخبط فيه معانيه إنما في غرامك ... أنا مجنون



و جنوني بيوصف حالتي بجد لا بخاف م اللوم و لا اصالح نوم و لا باشكي مشاعري ف سري لحد و باحاول قلبي يعيش في براح فبحبك حب يفوق الحد

...

نضلل عليكي

مش هآمن تاني ليكي مش هادوب تاني ف عنيكي مش هاقول تاني إني عاشقك مش هاوطی و ابوس ایدیکی ياللي كنتي العمر كله و الربيع و صفاه و فله ليه بقيتي الخوف و ذله ليه نسيتي كلامي فيكي ليه نسيتي إن انتي أمي قاسية ليه و تزيدي همي و قاعدة ف الأندال تلمى و اللي عشقك بيناديكي بيعتي ليه قلبي اللي حبك

و اللي كان ف الشدة جنبك ليه مسكتى في اللي سايبك و اللي عمره ما كان شاريكي توهتى رغم السكة واضحة و الأماني لسه طارحة ألف ضحكة و ألف فرحة و الأمل لسّاه غاويكي فوقى م الغفلة و قومى و اغسليني من همومي صلِّي تاني و يالًّا صومي رجَّعيني اجري عليكي فكِّى قيد الخوف ده عني و احضنيني .. أو تمني و انسى ظلمك و التجنى روحي هتضلل عليكي

••••

من غير فصال

صباحك يا غالية ... مالوش طعم خالص و جایب ف إیده كآبة و هموم و نازلة دموعه لا يتسدّ جوعه و تسعد ربوعه .. و کار هه تقوم بيلعن جدوده .. معدّى حدوده بیهدم سدو ده و خایف یعوم صباحك يا غاليه تملِّي مكشَّر و ماسك عصابة ف إيده و عقال بيشتم عيالنا و يخنق حلالنا و يتلف آمالنا بكلمة محال ف أيتها سكة .. مطبات و ربكة ولا فتح عكا .. ولا الإحتلال واخدنا مقاوله .. و شغّال علاوله أكم من محاولة و هو .. ما زال مازال صوته عالي .. يهز الليالي هموم مكتوبالي ...

و حوجة و سؤال

حبيبتي هاجيلك ...

ف عيني هاشيلك

و هابدر ف نيلك

أماني و آمال

أماني هاتطرح .. فنضحك و نفرح و من كل مطرح .. هييجو العيال يبصو لعنيكي ..

و لوني اللي فيكي

و يرمو ف إيديكي ..

حكاوي الوصال

ده واد لسه طازة ..

و آخر لذاذه و ناز ل أجازه ... لكن قلبه مال و دا و اد خلاصه ... غرق ف التعاسه و شايل رصاصه .. و عايزك حلال حلف تبقى طاهره ... و بيقول دى مهره لكن قوة قاهرة ... خدتها لشمال و دى بنت عاشقه ... و في الحب صادقه ما هياش مفارقه .. ولا في الخيال فصيحك ساعتها هيبقي جميل و هيجيب ف إيده ... أمارة و دليل و هیغنی لیکی و بنده یا نیل ير دو و لادك برقة و جمال يقولوا بلدنا و رجعت إلينا هنحضنها جمعًا ... و ننسى ف ماضينا و هنضم تاني و تمسك إيدينا و يبقى اللي باعها ده عبرة و مثال

هيرجع لجحره و ننساه يموت يحسّ بوحاشته و يغرق سكوت و يتمنى عمره في لحظة يفوت عشان كان غوريلا و عامل غزال حبيتي هتبقي و تبقي كمان عروسة بتضحك كضحكة زمان و هتعودي تاني معانا ف ميدان نشوف يعني بكرة ..

....

بدري ليه ؟

ليه يا ليلي جاي بدري و النهار لسّاه بيحبي ليه مقرب ليّا تجري ليه بتخنق فيًا صاحبي كنت سيب الصحبة حبة أمشي بيها في الحياة أقرا بيها كتاب محبة أو الاقى طوق نجاة ليه يا ليلي جاي بدري تخطف الحلم الصغيّر اللي لسَّاني هاشوفه و ابتدي من عنده اغيّر كنت ناوي بجد اغيَّر

كل حاجة مش مقاسي اسمي .. رسمي .. خط سيري حتى قلبى لأنه قاسى انسی میت عنو ان عرفته و الطريق منهم و ليهم ناس كتير ف حياتي مروا كنت مرة في يوم شاريهم سرقوا من جوايا روحي کت حروفهم سیف بیجرح بدِّلوا بالدمع ضحكه قلبی بیها کان بیفرح حتى أحلامي البريئة داسوا فيها و قالوا ماتت حتى لما حكابه تحلا يمسحوها . و تبقى فاتت جای لیه و انا لسه بادئ

في الطريق و باقول يا هادي و السما بتفتح بيبانها و بسنيني هابقي راضي حتى سكة بكره بانت بعد ما يئست إنى اشوفها و الحياة ضحكت لي فجأة كعبة و اشتقت انى اطوفها جای لیه .. بالله تسیبنی ابقى مرة بجد نفسى احضن الحلم بعيوني و انسى من جوايا يأسى

هاحاول

هاحاول من جدید ارجع و ارتب كل أفكاري هاشيل منها الوحش .. طبعا و افتش في اللي متداري عشان حتما حاجات تايهة ف زحمة عمر وحكاوي و بردو حاجات يجوز ضاعت ف قصة حب و غناوي من الجايز اقابلني ما بين لحظة و بين تانية و اشوفني و ابقى جوايا و اطوِّل فيا ... مش ثانية

انا هاعزمني على قهوة ف حته بعيده مقطوعة و افتش فيا على سهوه و لو بطريقه ممنوعه كتابي هافتحه كله و هاقر ا الحرف و الكلمة و اشوف كان ليه حاجات تاهت و إيه الفايدة و الحكمة هاحاسبنی کتیر جدًا على الوقت اللي ضاع مني على الحلم اللي حبيته و ليه على غفله خاصمني و لما امشي ف دروب روحي و اشوفها بجد من جوه

ها امدّ إيديًّا ف جروحي یجوز تشفی و انا اتقوی و هاحضني و اقول آسف على الأخطاء وع الزلات و ابوس راسى و إحساسى و مش هابكي على اللي فات مع القهوة .. مع سيجارة مع الوعد اننا أحباب أكيد الدنيا هتروق لي و انا و روحي ... هنبقى اصحاب

علی جنب

أنا اللى دموعه بتخونه و تنزل غصب عن عينه و انا اللى مشاعره مش ملكه و مرسومة على جبينه انا اللي ف عشقي مش خايف و مش شايف غرامي ذنب و لا اتنكرت له مره و لا رضيت اركنه على جنب و

عنواني

ما بين صبحك و بين ليلي و بين لحظة ما بتميلي و بين لحظة ما بتميلي و حسنك يبقى قنديلي باشوف دنيا بلون تاني باشوف فرحة ف عيون الناس و اشوف فوق الوشوش إحساس و تدفى الدنيا بالأنفاس و باعرف تاني عنواني



ضحكنلة راحن

لحظة تحسّ بضحكتك ... شبه الدموع و حاجات كتير كت حلوة فيك غرقانة جوع و انك بتنده من بعيد ...

إحساس وحش

على حلم رافض للرجوع إحساس وحش

إنك ف نور الصبح تلمس عتمتك

تدبل حروفك كلها

و تخاف تكون يوم كلمتك

تعلن ... سكوت

تتمنى لو عمرك يفوت

و تشوف سنبنك آلمتك



الحلم كان جواك كبير ...

من غير حدود

و الخوف حاولت يكون بعيد

و مالوش وجود

لكن خسارة ... ضحكتك..

راحت....

و مش ممکن تعود

أول ضحكة

يا أول ضحكة حسّبتها بتسري بجد في عروقي و متصاحبه على قلبي و تعرف تطفى نار شوقى يا همسة واحدة مكسوفة بتيجى ف لحظة تملاني و تسكن جوه من روحي فباوصف بيها عنواني يا اجمل حاجه قابلتني فعرفتني ... فحبيتها يا أصدق كلمه باسمعها و صار بين الضلوع بيتها



الشاعر في سطور

الإسم / فهمى على عبد المطلب نصر

الوظيفة / مهندس ميكانيكا

الحالة الإجتماعية / متزوج ولديه ولدين وبنتين

صفحته على الفيس بوك

۱۰۰۰۱۰۲۹۹۲٤٤۹۱۹https://www.facebook.com/profile.php?id=

صفحة شعر على الفيس بوك: مشاعر بجد

⁹B%^D%⁴A%^D% ^εB%^D%⁴°% ⁹https://www.facebook.com/%D /^Υεπ•εεττοιπλιαΕ-%^AC%D%^D%^A%^-%D1B%^D%



الفهرس

الصفحة	القصيدة	م
۲	بطاقة الديوان	١
٣	الإهداء	۲
٤	سكوت	٣
٨	لأ مش اصحاب	٤
١.	ليل مهموم	0
١٢	جرب	7
10	حلم وطار	٧
١٨	كل البشر شبهك	٨
19	۱۰۰ میدان	٩
71	أمل	١.
77	باب مفتوح	11
۲۸	بنظلمي	١٢
٣١	من غير ماتقولي	١٣
44	ف عنيكي دمعة	١٤
٣٦	باموت فيكي	10
٣٨	الأماني الطيبة	١٦
٤٠	الليل بيستنى الدفا	١٧

٤٣	معاه	١٨
٤٦	هااستنی هنانی	19
٤٩	الضدك تهمه	۲.
٥,	ليلي المتغرب	11
01	ظالماني	77
00	و مين !؟	77
٥٧	حنين ياليل	7 £
٦.	سفر	70
77	شارع أحلامنا	77
٦٤	الطابور	77
٦٦	الكفوف	۲۸
٦٨	فاكر لك	49
٧.	يامفرقين الوجع	٣.
٧٣	فوق	٣١
٧٦	صوره	٣٢
٧٩	مش كل ليل ضلمه	٣٣
٨١	الليل طويل	٣٤
Λź	من الأول	40
٨٦	لو مطرحك	٣٦
٨٨	باخاف منك	٣٧
97	قصة حياته	٣٨



90	سنيورة	49
١	هاتعلم	٤٠
1.7	بيفرق كتير	٤١
١٠٤	الدنيا المقفولة	٤٢
1.4	حبة أحاسيس	٤٣
1 • 9	تضلل عليكي	٤٤
111	من غير فصال	20
110	بدري ليه ؟	٤٦
١١٨	هااحاول	٤٧
171	على جنب	٤٨
177	عنواني	٤٩
١٢٣	ضحكتك راحت	0.
170	أول ضحكه	01
177	الشاعر في سطور	٥٢
177	الفهرس	٥٣